

【幸福个味緒】李淑娟原作

幸福係麼个味緒？有人會講，係放學時節轉到屋下，對灶下飄散出來个爛豬腳香味；有人會講，係阿爸下班過後圓身頂臭汗臊个味緒；也有人講，係暗晡頭屋背該頭桂花樹淡淡个花香。味緒，看毋著、聽毋著乜摸毋著，盡趣妙个係，佢總係做得同偲兜个回憶園共下，食著、鼻著共樣味緒个時節，回憶乜會跔等像戲齣樣仔又再放送出來。

吾爸在偲讀國中三年生个時節過身咧，因為發現肝癌个時節忒慢，既經第三期。佢辭忒頭路拖等著病个身體做咧年過个治療，攞吾姆同偲兩兄弟就轉長山賣鴨卵也。阿爸分偲印象最深个毋係長壽菸个味緒，毋係醫院吊大笏射个藥味，顛倒係厥手路菜「番茄¹炒卵」个好味緒。

阿爸个「番茄炒卵」定著愛特別用臨暗頭市場項伸个、有靠傷个、螻螻个番茄，因為該下仔頭家愛收攤也，會半買半相送。佢當沙鼻講：「雖然這毋係星級个材料，毋過有阿爸五星級个好手藝啊！」斷真哦！這項菜上桌个時節，紅啾油光油光个番茄，

合等該綿綿嫩嫩又黃蠟个雞卵，還旨入嘴就先吞口涎水哩。該香香又酸酸甜甜个味緒，單淨攪味就做得划忒兩碗白飯，這幸福个味緒一直囿在偲个記憶裡背毋會散忒。

阿爸做化療該段時間，阿姆天旨光愛先去送牛乳，再趕去工地做小工，無時間煮飯。偲同老弟輒常食白飯傍醬菜、豆腐乳、魚仔罐頭，係無就泡麵加一粒雞卵。阿爸愁慮偲兜營養毋罣，刻耐仔忍等身體个毋鬆爽煮菜分偲兜食。每擺酸酸甜甜个味緒食落肚，偲个心乜跔等酸酸甜甜，甜个係阿爸惜子个心意，酸个係，毋知還做得再食著幾多擺這幸福个味緒？

對偲來講，幸福就係「番茄炒卵」該酸酸甜甜个味緒，佢總會帶出偲最深、最甜个回憶，分偲看著阿爸黃蠟个面容項掛等滿足个笑容。這下偲又乜最驚食著這項菜，因為偲驚食忒多別家个「番茄炒卵」，會害偲添放忒記憶當中阿爸留分偲个味緒，該阿爸惜子个味緒，偲同阿爸共下个幸福味緒。

¹ 番茄：音 toˋ ma doˋ；番茄（英文 tomato），屬茄科，又名柑仔蜜、西紅柿等。

編號 2 號

【蔥仔】謝宜庭原作

「阿姆，佢就無愛食蔥仔，仰愛監人食啊？」阿綸牯緊挑忒¹碗肚个蔥仔緊喊到大嫲聲。佢摻佢講：「細人仔莫恁揀食啦！」阿綸牯嘴扁扁、會噉會噉个樣仔，實在有罅刺眼。食蔥仔敢有恁艱苦？

其實蔥仔當好食啊，像炒炒肉、煮惜圓係無放兜蔥仔就試著無香無氣！蔥仔佢從細食到大，因爭阿爸就係種蔥仔个啊。還記得細細時節，阿爸在田脣摘好蔥仔，佢摻阿哥愛去脣項个水窟仔搥手洗蔥仔，洗到歸身仔緊顫，一雙手紅冬冬。正月恁寒个天時，係做得捲被骨在眠床項搵等，毋知有幾好。

洗好个蔥仔分做兩斤一抓²、禾稈浸過水扭扭啊縳蔥仔，天光光阿爸就用野狼機車載去大市賣。有一年蔥仔當好價，阿爸賣蔥仔賣到有錢好起屋哩。該時，在莊下十過萬銀就起得兩棧个樓屋也，歸屋下人儕儕暢到耐毋得，發夢都會笑哦。毋過該下屋仔還言起，阿爸噯發生一件大事。

該日，阿爸去摻鄰舍搥犁田，毋知仰仔好恬恬噯分打田機捲落去。佢忍等痛遽遽蹶起來，毋過腳盤同腳趾公還係分耕耘刀仔削到血漬漬仔。大家嚇到發痴驚，煞煞摻佢送去醫院急診。先生講阿爸愛戴院，毋過該下日仔過到苦煎煎仔，仰有錢請人顧佢呢？阿姆高不將喊正七歲還言讀書个佢去顧阿爸，護士都阿腦佢仰會恁曉得。其實佢毋係曉得，佢係毋盼得阿爸無人顧定定。

逐日臨暗仔，阿姆會渡阿哥、老妹來醫院摻佢做伴共下歇。食飽夜，佢兜細人仔就會去醫院个晒棚項搞園人尋。做鬼个人偷偷撈撈去尋人，園个人乜搞到心肝哼哼滾，實在還好搞哦。

天甫光仔，阿姆佢兜轉屋下，又伸佢一儕顧阿爸也。佢頭磬磬仔看在眠床項睡等个阿爸，細細聲講：「阿爸，你愛遽遽好起來哦。等你出院，佢俚就做得起屋仔哩。」該時佢還毋知，阿爸賣蔥仔賺來愛起屋个錢，早就分戴院个醫藥費食忒，無伸半銖錢³也。

逐擺看著青里里个蔥仔，佢還會想起該冷沁沁个寒天、凍到硬鉸硬鉸个雙手、起新屋這深深个盼望、阿爸著傷个悲傷，還有在醫院搞園人尋个暢樂。一抓蔥仔，毋單淨有錫人个香氣，還有佢淦淦个回憶，張等人生个酸甜苦辣、百樣滋味。

¹ 挑忒：音 tiau` ted`；經過挑選後，除去不合適的。

² 一抓：音 id` za`；一把。

³ 半銖錢：音 ban xien` qien`；半分錢。

編號 3 號

【金蘋果】郭亭好原作

佢當驚注射，你係毋係也同佢共樣呢？為著制這站時間滅射人个惡霸——流感病毒，診所肚排滄滄等等愛注預防射个大人細子。細人仔驚到嘅嘅滾、噉到目汁濫汨，看著恁樣个情景，分佢恹起頭擺，該個驚注射个佢，還過乖乖注射了後就有个「金蘋果」。

屋下淨佢一個妹仔，阿爸講佢這個心肝妹屎係佢同註生娘求來个；佢若係去外地出張，轉个時節定著會跲跲去雜貨店買兩罐佢盡好咁个蘋果牛乳——「金蘋果」轉來分佢。毋過佢從細嘴毋穀，歸個人像瘦猴仔樣仔，動啊著就破病愛分醫生看；阿婆毋盼得，講：「你看哪！細人仔畜到瘦夾夾仔！又總係破病，這愛仰仔撚正會作肉？」阿爸捕等佢个時節也講：「你看，若腳像鳥腳樣仔，無細義分人拗一下就會斷忒哦！愛加食兜仔正會大，知無？」

一擺佢發燒，燒到歸身軟怠怠，在眠床捕等被骨，寒到激激顫。阿爸對外背轉來看啊著，黏時同佢背等，舂等去醫院尋醫生，醫生看咁講：「還係愛注一笕射較遽好！」聽著愛「注

射」，本旦還手軟腳犁个佢，跋起腳就愛走，連鞋跌忒也毋管哩！阿爸遽遽逐來同佢揪等，捕轉去凳項坐；佢一幹頭，看著護士阿姨擎等一支大大笕个注射笕仔在該抽藥水，阿姆哀唷！該佢會死咧！跲等就在阿爸圓身項緊奮，毋過阿爸生來高長大漢，佢就像分佛祖砌在五指山下个孫猴精，仰仔都走毋出厥个手巴掌。

看著毋修勢¹哩，佢就開始另命大噉²，佢兜哪有可能恁仔就放佢過？阿爸大力同佢捕核，過同吾兩隻腳夾纏，護士阿姨也當遽手，一個摻吾褲頭揪較下兜仔、一個注射，黏時就完成佢兜个任務也！單淨留噉到凜流凜串个佢，伏在阿爸肩頭啐啊啐欸³。阿爸細細聲溫柔个講：「毋好噉哩，恁樣已見笑哦！你當慶，為著獎勵你，等下阿爸帶你去買你盡好个『金蘋果』分你哦！」

在轉去个路項，阿爸用厥該又貴又燒暖个手同佢牽核核，吾嘴項咁等張有阿爸滄滄愛个「金蘋果」，頭下注射个痛做下毋記得哩。佢想，該當時个佢怕係全世界盡幸福个人哩！想起來，也好得有「金蘋果」渡佢耐過該段驚注射个童年。

¹ 毋修勢：音 m^ˇ cam se；形勢不佳。

² 另命大噉：音 nang miang tai gieu；使盡生命之力大哭。

³ 啐啊啐欸：音 sud a sud e[`]；抽泣著的聲音。